

# Nus e l'islam

In magazin infurmativ edì dal palazi federal

DA GUIU SOBIELA-CAANITZ

■ Il Departament federal dals affars externs (DFAE) publitgescha mintga quartal ina revista gratuita en format da magazin che cumpara en trais ediziuns, ina franzosa, ina taliana ed ina tudestga. Da chalanda fanadur è arrivà il numer da stad, deditgà cunzunt a l'islam. La recensiu che sunda sa basescha sin l'edizion taliana (1).

## «Enavos tar Muhamed!»

La tavla da materia precisescha: «Ils texts n'expriman betg adina il parairi uffizial dal DFAE» (p. 2). L'editorial da la redactura Dorothe Schnyder punctuescha: «Mintga religiun u ideo-logic ha ses fundamentalists. Cur ch'i pon sa far valair, sa chatta la democrazia en grond privel. Il fundamentalissem sa basescha sin la pretensiun d'ina vardad absoluta. Tgi che sa crai en possess da lezza excluda tgi che manegia autramain (...). Lura vuli be pli in pass pitschen enfin ad extirpar tuts quels. Il fundamentalissem n'ha betg spetgà ils attentats dals 11 da settember per mazzar glieud. Il fundamentalissem medieval cristian pendeva [u ardeva, G. S.-C.] tgi che manegiava autramain (...). Il fundamentalissem nazional ha manà a la catastrofa da la seguda guerra mondiala (...). In fundamentalist gidieu ha mazzà 1995 l'emprim minister Rabin (...). Il fundamentalissem scumonda adina da patratar (...), e refusescha da discuter ideas. Il scleriment ha pruvà da liberar il spiert uman da las chadainas fundamentalistas. Voltaire ha resumà sia esenza a moda fitg cumpetenta: 'Jau odieschel vossas ideas, ma sun pront da dar mia vita per che vus astgias las exprimer' (p. 3). Il schurnalista arabist ed islamolog Erich Gysling declera la pussanza dal fundamentalissem aifer l'islam d'oz cun plis fatgs: «Sunter circa il mez dal 19avel secul ha il colonialissem da l'Occident fatg vegnir malsegira la populaziun dals pajais musulmans. Lezza giada èn cumparids ils precursurs dal fundamentalissem. Quels ideologs faschevan la dumonda: 'Pertge essan nus vegnids uschè flai-vels, schebain che nus eran ina giada uschè ferms ed abels da sviluppar ina cultura avanzada? La resposta clera è che nus avain bandunà la via gista, numnadama in il sistem elavurà dal profet Muhamed (...) che manaiva ad unir religiun, politica, economia, etica etc.' Pia gist il contrari da l'ideal da l'Occident, la separaziun da las pus-sanzas» (p. 8). Muhamed ha predegia en l'emprima mesadad dal settavel tschientaner.

## In secul da snegaziuns da dretg

Sco funtauna dal fundamentalissem musulman numna Gysling era la politica orientala da Frantscha e Gronda Bretagna durant l'emprima guerra mondiala (1914–1918). In islamolog franzos da derivanza algerina anticipa-cha lezza funtauna enfin a 1911 e re-sguarda er auters pajais: «La cuminanza musulmana sco tala sa sentiva smanatschada d'ina sort cruschada europea bler pli starmentusa che las me-dievalas (...). 1911–1912 ha l'Italia annectà la Tripolitana [oz part da Libia, G. S.-C.]. En mars 1912 è il Ma-roc vegni sut il domini da Frantscha e Spagna (...). 1914–1917 han la Gronda Bretagna e Russia occupà l'Iran (...). Ils musulmans han resentì pliras acziuns politicas europeicas sco tradimenti ed a medem temp snegaziuns da dretg» (2). I sa tractava dal sid da l'Imperi tirc, cun populaziuns arabas e curdas, che la Frantscha e Gronda Bretagna, sias inimias, han parti ensem-



L'islam collia passa ina milliarda umans, da Senegal a las Filippinas, da Xinjiang uigur a las Comoras... ed en l'Europa. La charta mussa be pajais menziunads en il text.

G. SOBIELA

gia 1916, sperond da gudagnar; la Frantscha dueva survegnir t. a. la Siria ed il Libanon. Colonel Thomas Edward Lawrence («Lawrence of Arabia», 1888–1935) e Faisal ibn Hussain (1883–1933), prinzi arab da Mecca, han manà lur armada cuminaivila enfin a Damascus (Siria), nua che Faisal è entrà 1918. En mars 1920 è'l vegni proclamà retg da Siria d'ina Dieta na-zionala siriana. Ma en matg ha ina conferenza internaziunala incumbensà definitivamain la Frantscha d'admini-strar la Siria; l'armada franzosa ha conquistà Damascus en fanadur e chatschà Faisal, il qual è lura (1921) vegni retg da l'Irac sut la controlla da Londra. Areguard la seguda mesadad dal 20avel tschientaner menziuna Gysling «la parzialitat dals Stadis unids a favur da l'Israel ed a donn e cust dals Palestinais. Quista dumonda influenzescha dacurt adina dapli ils umans dal Proxim Orient, nua ch'i crescha la persvaziun che l'Israel ed ils Stadis unids fetschian guerra encounter l'islam» (p. 9). Sur da quai declera il scriptur israelian Amos Oz: «L'Israel duai metter fin a la guerra e l'occupaziun en ils intsches palestinais e bandunar las colonias gidieus erigidas aposte en lur mez. Ins duai trair ils cunfins da l'Israel (...) confurm a la pretensiun moralà da renunziar a do-minar ina populaziun ostila (...). Sche la fin da l'occupaziun na maina la pasch, stuainsa far be pli ina guerra empè da duas; lura n'esi betg pli una guerra per occupar l'entira Terra son-tga, mabain per noss dretg da viver en in stadi gidieu liber e suveran en ina part da lezza terra» (p. 14).

## 4.26% musulmans en Svizra

Ina charta geografica (pp. 8–9) mussa la derasaziun da l'islam en il mund. L'intsches cun ina clera maioridad musulmana tanscha da l'Indonesia al Senegal e da l'Usbechistan a la Somalia. La charta na mussa deplorabla-main betg il Xinjiang uigur (China) cun 17 millioni olmas, la plipart mu-sulmanas. Intschess musulmans a sid da l'equator èn be Sansibar e Pemba (Tansania), las Comoras e cunzunt las parts principalas da l'Indonesia. A l'islam en quest pajais (88% da la popu-laziun), la Malaisia (53%) e las Filip-pinas (5%) è deditgà in artitgel dal schurnalista Jürgen Hanefeld (Singapo-re) che menziuna il separatissem dals «musulmans dal sid da las Filippinas,

dischavantagiads dapi seculs», e d'ina provinza en il nordvest da l'Indonesia, «spogliada e supprimida da la pussan-za centrala» (p. 24). L'Africa dumbra 18 stadis cun maioridad musulmana. La charta da la revista mussa era l'islam en l'Europa. Ins enconuscha sia preschientscha tradiziunala en la Pen-insla balcanica: Albania (70%), Bos-nia-Ercegovina (44,3%), Macedonia (30,1%), Jugoslavia cun Kosovo (19,3%), Bulgaria (13,1%). I sunda ils pajais d'immigraciun, l'emprim la Frantscha (5,1%) e lura la Svizra (4,26%) avant tut tschels. La schurnalista Rosmarie Gerber (Turitg) descri-va la situaziun en noss pajais, cun 152 000 musulmans 1990 a 310 000 en 2000, pervi da l'immigraciun bal-canica e tirca: «Il chef da la seczun Pedagogia interculturala da la Direc-zion turitgaisa da scolaziun punctue-scha che l'abilitad dals immigrads da s'integrar dependia da lur statut social (...). La retschertga 'pisa' mussa (...) ch'ils giuvenils da la seguda genera-zion immigrada han ina scolaziun bler mendra ch'ils Svizzers contemporans. Ins duai pia sa sfadiar dapli per la sco-la» (pp. 16–17). Il cussagl suandard da Gysling na vala pia betg be cun l'Orient, mabain er tar nus sezs: «Ils plis musulmans na s'identifitgeschan cun las ductriñas fundamentalistas. Dialogar cun els n'è betg be opportun, mabain era ina sfida fritgavila; i po dar ina dimensiun nova a nossa cultura» (p. 9).

## Sa referir al Dieu da compassiun

Impuls en quest senn dat il decan dal cussegli naziunal, il Vadais da derivan-za flama prof. Jacques Neirynck (pcd), naschì a Bruxelles: «Oramai che nus stuain viver cun l'islam sut in tetg, na duainsa resguardar quai sco in squitsch, mabain sco in'occasiun (...). Quant lunsch insumma pratigescha l'Occident sia religiun gidieua u cri-stiana (...)? Nossa societat ritga mira a producir e consumar senza cunfins, senza resguardar ils dischavantagiads, senza respectar l'ambient. Il cristianis-sem dat l'impressiun d'ina religiun stracca. Ils stadis democratics d'oz han surpiglià ed adempleschan ses cuman-dament central, tgrond ils malsaus, instruind tuts uffants e gidond ils pau-pers en basa a reglas giuridicas ed ad-ministrativas, senza stuair appelliar a la cumpassiun da la glieud. Pertge duess

ins sa referir a Dieu en societads ord-vart civilisadas che viven en surabundanza? Ma sche nus n'ans referin betg pli a Dieu, lura n'è il conflict tranter l'islam e l'Occident betg en emprima lingia ina guerra tradiziunala tranter religiuns, mabain plitost ina disputa maidudida tranter ina religiun e in'absenza da religiun (...). L'islam sto bat-ter per mantegnair sia cardientscha (...). Ins duai pia sa dumandar sche l'opposiziun desperada da l'islam na saja betg la davosa resistenza d'ina cultura essenzialmain spiertala encunter la conquista dal planet entrais in mate-rialissem basà sin l'economia da mar-tgà. En l'Occident datti glieud che du-bitat tut; i duessan resguardar l'endiri-da da l'islam sco in'admonizium che nus n'astgian betg abandonar nossas atgnas valurs spiertalas (...). Mu-hamed stat en la lingia da Moses e Jesus; el ha proclamà la doctrina, zappada [u emblidada, G. S.-C.] avant el, da la cumpassiun da Dieu, il qual na der-schia quels umans che vulan esser mi-sericordaivel, mabain als spendria-tuts. Sin basa de lezza intuiziun, cen-trala en l'islam, pudess ins medegiar bleras plajas avertas dal cristianissem (...). È l'islam pia il precursor d'in cri-stianissem regenerà? Declerai quai tut-tina als manaders da las baselgias! Su-megliantamain s'exprima in istoricher catolic, president da la Fundaziun na-zionala da politologia (Paris) e com-member da l'Academie franzosa, cun l'exempl da la «Comunità Sant'Egidio» (Roma): «Lezza cuminanza da laics ha mussà fantasia colliond con-temploziazun ed acziun a moda originala (...). I sa deditgeschan a servir ils pau-pers ed a promover la pasch en il mund (...) en la lingia da Son Fran-cesc d'Assisi, il qual è i tar il sultan a dialogar e far amogna da la pasch» (4). Na fiss quai ina missiun per noss 21avel tschientaner?

1) Svizzera oltre, 3/2002. Abunaments gratuiti: Schaer Thun, 3661 Utendorf, telefon 033 346 61 11, fax 033 345 63 23, posta electronica druckzentrum@schaerthun.ch

2) Ali Merad, L'Islam contemporain. Paris (Presses Universitaires de France, ISBN 2 13 038484 7) 1984, pp. 66–67.

3) Jacques Neirynck, Mit dem Islam leben? Mit dem Islam leben! En «NZZ am Sonntag», 16 da zercladur 2002, p. 23.

4) René Rémond, Le christianisme en accusation. Paris (Desclée de Brouwer, ISBN 2-220-04833-0) 2000, pp. 151–152.